



KBC THUSO

Kum 53 Ihinna

Lhajing/August 2016

SO448

DAMTHEINA



B. BOLANG BAPTIST CHURCH
Gambh No.2
HOU- IN THENSO LEH
SILVER JUBILEE

SEPTEMBER EVENTS

- * SHALOM BIBLE COLLEGE - 04 * CHRISTIAN EDUCATION DAY - 11 *
- * KANGGUL CHRISTIAN COLLEGE *

July 2016

Kapa Theng, rini pumchat in: kang 4 amano yang
pumchat abitheina diog on, kangman amaboli beog in

**S. Saheibung Baptist Church, KBC Gambih No. 7
Gambih Pastor Rev. Lamkeng Lhouvum in
Khangthah phabep Baptism abol na.**



**B. Boljang Baptist Church Gambih No. 2
Silver Jubilee leh Hou in Thah Thenso na KIN**

CONTENTS

THUMAKAI HO

1. Editorial/ <i>Pathen toh kicham un</i>	1
2. Menstrual Abnormality / <i>Dr. Neiting Haokip</i>	3
3. Christian Education/ <i>Rev. Paolen Haokip</i>	6
4. Ecumenical/ <i>Rev. Silas Jangminlen Haokip</i>	9
5. Kitha kimat jona/ <i>Rev. Dr. Thongkhosei Haokip</i>	12
6. Lhagao mangho huhdoh ute/ <i>Rev. Ch. Chungkholet</i>	16
8. Mission Column	18
9. Christian Education Column	20
10. Finance Column	22
11. Women Column	23
12. Youth Column	24
13. SBC Column	26
14. Report	27-35

EDITORIAL BOARD

<i>Chairman</i>	: <i>Rev. Dr. Hawngam Haokip, President KBC</i>
<i>Editor</i>	: <i>Rev. Ngamjapao Haokip, General Secretary</i>
<i>Joint Editor</i>	: <i>Rev. Silas Jangminlen Haokip</i>
<i>Contributing Editors</i>	: 1. <i>Rev. Letpu Kipgen</i> 2. <i>Rev. Henjalén Doungel</i> 3. <i>Rev. Onthang Haokip</i> 4. <i>Rev. Kaikhokam Chongloi</i> 5. <i>Pastor Paokhohao Haokip</i> 6. <i>Pastor Satminlen Khongsai</i>
<i>Cir. Manager</i>	: <i>Ms. Lhingjanem Haokip</i>
<i>Design & Layout</i>	: <i>Hemkholen Haokip</i>

THUSO LAHMAN

Church/Organisation/ DepartmentRs. 200/-
IndividualRs. 100/- (Post a Rs. 200/-)

Indian Overseas Bank, Imphal Branch
A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 9612817768 Contact thei.
Circulation to kisai lam Mobile No. 9862633173 bol ding.



“Pathen toh kicham un,”

(Be reconciled to God)

Text. Gen.3:23; 2 cor.5:20

Thumakai : Tunia jong Lhajing lha (August) ihung lhun thei jal'un ipau pathen kahin thangvah in ahi, chule hiche Thuso subscribed ana bol'a lunglut tah'a anasim ho jouse chung a jong kipa thu kahin phong in ahi. Chung a Bible chang hung kipe chomcha gelkhom'te, Pathen thun aseidungjuija chu lei Eden hon a chu mi masa teni chun pathen thupeh ana ngailhon lou jeh'a Pathen in Eden hon'a kon'a ana nodoh ahi ti chu kichen tah in chung a hung kipe Bible Gen.3:23, ah chun imu'un ahi. Hiche toh kilhon in Eden hon niso lama chun hinna thingphung lampi ngah dingin vantil lhanei chu achensah in, chule chamjam koujeju chu akipei kimvelle sah tan ahi. Vs.24. Hiche source dungjuija chu pathen le mihem te chu kikhen na um ahitai. Hichea chu chamna (reconcile/reconciliation) chu ngaija ahitai.

“Ngaidamna” (forgive/forgiven) leh” kichamna” (reconciliation) kitihi phat tah’a gramatical dungjuija analyse ibol leh akikheh na aum in ahi. Hijongle khat louva khat achanga lhing theilou khat in aum kit in ahi, ajeh chu kichamna aum lou leh ngaidamna um thei lou ahi. Mihem le mihem kikh jenga jong khat joh2 chun kei kathemmo tai tia thupha choina aumlou leh kichamna um thei lou ahin, ahinlah pathen in mihem te ho ingaidam nao hi umdan chom beh (special condition) ahi ti iheuvin ahi. Mihemte ho kho he phalouva ium laitah’uva Pathen chapa Jesu Christa chun a van laltouna ahin dalhah a lei mihem te lim banga hung kistem’a a-pa Pathen angunga eiho lhatdoh theina dinga longlhen theng tah gan kihinglha banga hung kipedoh a chu’a kon’a pathen chun mihemte chu achapa changkhat seh Jesu Christa mel’a ihin mu’uva chu’a konna pathen ngaidam ichan thei’u ahi, (Rom. 12:1).

Akicham ho/ akingaidam toho umdan: Amahohi amasang in lhakhom thei louvin um jong leu, ahung kicham or ahung kingaidam to phat’un ahung lhakhom thei taovin, anekhom un, adonkhom un chule ahung kingailu to taovin ahi. Mihemten mikhat akingaidam khu eima phat chomna ding hilouva, ama pa/ nu sukhel or bolkhel ho chu phulah ding go louva kimoh ngaidam jeng ahi. Chutobanga chu Pathen in jong mihemte hi eiho phatna leh hatna jeha hilouva achapa jal’a chu ngailutna imoh chan uva ingaidam joh’u ahi. Ajeh chu Jesu Christan eiho’a dinga chamna ama tahsa

*pumpi chu ahin pehdoh jenga athisan
na mihemte chonsetna jouse chu ahin
sopthenga, hijeh a chu pathen in mihemte
hi achapa jal'a chu ngaidamna eichan'u
ahitai.*

*Achaina : Gladys stains, Orissa Mission-
ary Graham stain in-neipi chu ahinkhoa
patepna sangtah anato chu vannojin
ahesoh in ahi, a-in neipu le achapa ni orissa
gama Hindu hon meija ahinlai changa Gari
sunga ana hal'u ahi, khonung in Court in
amaho chu ahin khou va Jail'a um ding
ham or khailih ding ham tia amanu chu
thudoh ana neinaova chun aman Christa
jalla ka ngaidam'u ahitai tin anaseijin ahi
ti iheuve,(pathen thangvah in um taken).
Ama nuhin pathen a ngaidamna dihtah
achan jeh leh pathen toh kicheh taha
kichamna aneijeha hitobanga chu, Mitheng
paul in philippi mite henga, " Eihatsah pa
vanga ijakai bolthei kahi,"(phil.4:13) tia ase
banga chu Gladys stains in jong ase thei
ahi. Hijeh chun kasopite ho tunin nangle
ken jong tahsa damtheina ingaichat banga
lhagao hinkhoa jong damtheina inei dinghi
athupipen ahi, hichena dinga chu Pathen
toh achapa Jesu Christa a kichamna inei
angaitan ahi. Pathen in asim jousea ding
in phat thei iboh peh tao hen, Amen.*

Menstrual Abnormality in Adolescence

(Numei khangdong Nihsop ading dol a umlou)



Numei kum 12 a pat kum 19 chan ho hi lhathi nei aphatcha umlou tampi aumin, adeh a tulai numei chapang ho a hin aum nomin ahi. Abang tamtah longdoh, abang aphatcha umlou, abang lhani lhathum dan seh a um, abang lhomcha umjong aumin ahi. Hiche hi thikang le chuleh natna hi adang dang numei hina ho a pat hung umji ahi.

Lha thinei ho tamtah alon doh le aphatsung asao thu:

- 1) Numeija kon'a thisan hunglong doh ji hi adeh a Estrogen harmone atam teng sohji ahi.
- 2) Thyroid nat na jeh: Thyroid level hi lhomcha ahilou leh tamtah aum teng lhathinei hi ading dol in aumji pon ahi.
- 3) Numei sunga um Ovary kiti chibom'a hi natna ahung um'a, adeh'a PCOS kiti natna jeh a umthei ahi.
- 4) Thisan a kon'a natna hi (blood cancer, ITP etc)
- 5) Numeija kon'a tuinang um eg. Fibroid
- 6) Naovop pet'a thisan long or abortion (Naose)

Hiche natna hi adeh'a numei lhathi nei phatsunga abang chomcha ahilou leh abang phat sottah umho hi phatecha kivetsah angaije. Ahilou leh anaemia (thisan lhom) umthei ahi. Hiche kivenna dinga hi text alhom pen'a anoija ho hi bol angaije.

- 1) Routine blood test
- 2) Thyroid test
- 3) Sonography etc.

Kivending dan:

- 1) Numei chapang ho hi aphatcha chule phatecha counselling bol angaije. Chule hetsah jing ding vel hil chet kit ji ding ahi.
- 2) Psychological support peh ding
- 3) Rest (kicholdo angaije)
- 4) Thisan alhom leh pehbe ngaid-ing ahi.
- 5) Iron Syrup pehthei ahi.

Hiche chung a kivenna kipe ho hin

na atoh lou leh progesterone tablets 21 days sung pehthei ahi. Hiche jenga jong chu na atoh deh lou leh Estrogen injection peh thei ahi.

Achaina hiche lhathi nei ading dol a aumlou hi numei kum 12 a kon'a kum 19 sunga ho hi phatecha counselling peh ngaija ahi. Hiche hi mihem chibom le lhoh lam kikai matna apilhin lou lai jeh ahi.

GYNAE AND SKIN CARE CLINIC



Dr. Neiting leh aloipa Dr. Thangjamang hin

"GYNAE AND SKIN CARE CLINIC"

kiti ahong lhon in, koi tobang Numei natna lampang a damna ngaicha chuleh Tichung a vun natna ho a kivetsah thei ahi.

Hetbe nom neiho adeh a eipao va jong kihoulim theina ahijeh in angaicha jousen Lamphel Supermarket hin jot thei ahi.

CHRISTIAN EDUCATION DOI LE TUP

Rev. Paolen Haokip (D.Th III, ATC)

Thumakai

KBC hi Pathen mapui najallin tahsa le lhagao lama akimachal jingin kipa aum lheh jengin ahi. Pathenin lamkai phatah tah (Pastors & Lay leaders) le tahsan umtah tah jong tampi eipeuvin Pathen i-thangvah un ahi. Ahin khantouna tampi aum vangin lhahsamna jong akivat deh pon ahi. Houbung chule namsung damtheina dingle khantouna dingin chihna le thepna hi athupi lheh in ahi. Thepna le chihna kimu nathei lampi jat chuom chuom aumin ahin hiche tampi ho lah ahin 'Christian Education' hi thil poimo tah khat ahi. Christian education akiti teng thil tampi hetding aumin ahi, ahin space alhom jeh'in abonchan kiseijou pontin hijongleh Christian education thumakai (introduction) tobangin chomcha anaveu hite.

Christian Education: Hilchetna
 Amasan 'education' hi ipi tina ham anave masao hite. 'English' thucheng 'Education' (thiemjilna) hi Latin paova pat hung kuondoh ahin chule Latin thucheng thumin hettheyyin aumin ahi. Khatna: Educare akitin akoudoh 'dopdoh/doptou' (to bring up) or 'vahkhang' (nourish) akitin ahi, hichu chapangin adoi le atup amolsuo thei nadinga kipuikhang tina ahi. Nina: Educere akitin, akoudoh 'puidoh' (lead out) or 'lahdoh/kaidoh' (draw out) akitin, hichu

chapang ama hiina hoipen kimudosah/kihetdohsah (draw the best in child) tina ahi. Thumna: Educatum akitin ahi akoudoh 'mihil' (the act of teaching), or 'kijil' (training) tina ahi, hichu 'mi kihil' (the act of training) akitin ahi.

Christian education hi Jesu tahsanna chule Ama seijuiya pangho umchan dingle chawnchan ding dan kihilna ho ahi. Achunga education hilchetna kipe le Christie hinkho manding dan akigopkhom le Christian education dihtah suoh-

doh ahi. Christian education hi mihiem khat in ahiina jouse Jesu umchan le chawnchan tobanga aumthei na dinga kihilna ahin, chule tahsa le lhagaova khantou theina dinga mun-pha (environment) kisiem peh-a chule thil jat chuom chuom kituosah'a (experience), hiche hoa konna 'Christian' hinkho dihtah apohdoh theina dinga kihilna ahi. Jesu thuhil ho ngaiya chule nitchu 'Christian' dihtah ahi. Jesu thuhil (kipana thupha) hi 'Christian' ho bou hilouva vannoiya mihiem jouse seipeh ding (Acts 1:8) chule mihiem in Kipana Thupha to kitoh'a thilpha akilhen theina ding jong ahi.

Christian Education: Doi le Tup

1. Seijui semding (Making disciples)

Jesu athia athodoh jouva vanna akal tou masanga seijuiho henga athupeh, "Nangho vannoi leiset gam jousea cheuvin lang thilsem mihiem namkim jah a hiche Kipana Thupha hi gahil lhang leuvin" (Mk. 16:15), chule seijuiyin gasemun, a-Pa, a-Cha, chule Lhagao Theng min'ah amaho chu Baptize gabol'un (Mt. 28:19) ati hi Jesun aseijuite mopohna apeh lenpen ahi. Jesu Christa seijui sem ding hi atahsan chate jouse mopohna lentah ahi. Adeh in hou lhacha hole sunday school zilkung ho mopohna alen in chule natch thupi tah ahi. Hetna le thepna sangtah neiya mangcha nomlou ho sanga, lhomcha neiya pontho taha pang ho phattheina le lolhinna sangtah

chang ding ahi.

2. Khanlet nadinga ngailut tah a vetkol ding (care)

Jesun Simon Peter jah a, "John chapa Simon nangman neingailut em" tin thumvei adongin ahi. Simon Peterin adonbut in "henge Pakai kangailut nangin nahenai' ati, chuin Jesun "Kakelngoi nou ho vah-in" ati (Jn. 21:15-17). Kelngoi vah-in kiti hi khanletsah (nurture) ding chule lungsiet tah-a vetkol ding (care) tina ahi. Chutobanga chu mihiem ho hi tahsa le lhagaova khanlet na dinga lungset le khotuo tah'a vetkol ding ahi. Houbung hihen, khosung hihen, chule eima insung hile tahsa le lhagao khantou thei na dinga alhasam ho puihoiya vetkol ding hi atahsan chate mopohna ahi. Nikhat mipa khat le achapa Pathen thua akihou lim lhonin ahileh, athu chu hoi asah behseh lhonin, achapan "hepa Pathen thu hi athupi behseh in koima koma seidoh po hite" ati. Hitobang thilpha hea aheng akom seipeh nom lou jong umda lou ahi. Ahin hichu Christiante chawndan ahipoi. Chule apha hea bol ahivanga ngailutna bei, hichu pannabei ahikit in ahi Thilpha hea ngailutna neitah a bolpa/bolnu chu phattheina sangtah chang ding ahi.

3. Thungaina le Thununa (obedience)

Seijui ho le atahsan chate mopohna hi mi (tahsana neilou chule Pathen thu jakha lou ho) Pathen thu hetsah ding chule juisah ding ahi. Jesu Christa Pathen cha

ahi jeng vangin kineosah tah in Calvary cross'a ahung thi ahi. Aman a-Pa thu angai banga eiho atahsan chate jouse Ama thua ikiphudet ding hi Ama lungdei ahi. Tahsan vangin Abraham akikou chun, agam adalhan Pathen in akouna lam jon ding in akipat in achedoh jengtan ahi (Heb. 11:8). Khonung phat sohtah jouvin Pathen in Abraham henga angailut achapa Isaac chu maichama katdoh ding in ahinseitan ahileh aman athu angaiyin Pathen in aseil bang chun aboltan ahi (Gen. 22:1-13). Abraham thungai banga Pathen thu ingai cheh diuvin ikitem un ahi.

4. Pathen thu aseil le abol kop ding (words and deed)

Solchah hon Pathen thu alhangsam jeh un mihon abolgenthei l'heh un ahin amaho niseh in houin le aintinuva thu hilleh, Jesu chu Christa ahi tia thupha hil atangdehpouve (Acts 5:42). Pathen in mihiem jouse thilpeh khatcheh afeh ahi, hiche thilpeh chu manchah a huhhingna thupha seidinga eidei u ahi (Rom. 12:6). Hiche thilpeh chuom chuom: solchah, themgao, kipana l'hangsam, chinghoi kaihoi, chule mihil hina, lhacha natohna dinga kipe hohi Christa tahsa (houbung) chu khantou sah nading (pilhinna) ahi (Eph. 4:11-12). Hiche thilpeh ho hi sei thepma kichai hilouvin tohdoh angaiyin ahi. Ajeh chu tahsan jong natoh beiya chu achanga athisa ahi (James 2:17). Houbung sunga atahsan chate jousen Pathen thu hi simding, hetding, chule hilding ahi.

Khumkhana

Jesu Christa a dettah a kibul phuna aum teng, kineosah tah a umding daan kithem intin, chawnding dan (discipline) jong kithemding, tahsa le lhagao damtheina jong inei ding ahi. Chule hinkho sunga hahsatna le kipana lamto ding daan kithemding, thilse thilphalou tamtah a kona kikikan se theiding ahi. Pathen thua dihtah a ikibul phu tengule hitobang hinkho ineisoh kei ding ahi. Tulai mi tamtah Pathen thu jat chuom chuom chule thil thah thah jah ding atha anomun hichu asepon ahi; ahin Pathen thu aja le thilthah ahet banga ajuiding mi alhom in aphamo l'heh e. Lentah a kipat angai pon ahi, neocha hijongleh athu hi ahina banga akijui phot le tahsa le lhagao hinkho khangtou jeng ding ahi.

Pathen lungset najallin KBC in kumseh le Sunday School Teachers' Training akineiyin chule 'Shalom Bible college' jong aumin kipa aum l'heh in ahi; hiche teni hi Christian education dinga 'training' le 'institution' phatah ahi. Khat cheh in iphat chuom pi ding hi ikinepnau le itaonau ahi. Tupet in gelbang le deisah bangin umjou hih jong le Pathen in pha asah le nikho khat le lolhing tah ahung hiding ikinep lelou ding ahi. Hijeh hinoubung sunga lamkai chule member hon igelkhoh cheh uva chule amachal theina dinga pan ilah soh kei diuvin ikitemun ahi.

TAHSAN A EVANGELICAL - NGAIDAN'A ECUMENICAL

(Evangelical in Faith; Ecumenical in Outlook)

Rev. Silas Jangminlen Haokip

Philosophy

Kum jabih 17 phatlai chan chu John Calvin's Predestination theology in protestant christian ho analodim jeh in Christian mission in Europe leh America ana khel joupon ahi. Ahin, kum jabih 18 kichai kon lam in Baptist pastor William Carey in hichu adihlou dan ahin tahlang toh kilhon in gamchom munchom chom ah protestant missionary hon Kipana Thupha ahin polut tauvin eiho chenna gam jenga jong South langa Welsh Presbyterian mission-te Mizoram akon in analut uvin, gamkai langkhat langa American Baptist (ABC) ho ahung lut uvin tunia KBC hin ABC a kona kipana thupha ina chankhah u ahi. Hiche hi kum jakhat masang thusim ahitai.

Tunikho a baptist ihi nauhi kipana thupha hi American Baptist Church te akona ina mu jeh u ahi in chuleh tunikho chana amaho noiya kikhai jing nalai ihuive. Ahin baptist te history ivet teng baptist hi jat khatseh um ahipon, jat chom chom ana um ahi. Baptist tia kiminvo houbung jousen chena lhongpi khat'a kibahna anei jeng vang uvin, asunga tahsan thuhil leh houbung kivaihomna akibang joukei dehpon ahi. Baptist ten chena lhongpi or tahsan lhongpi (Baptist principles) anei houchu Bible thuneina (Biblical Authority), Khotol houbung chamllhatna (Autonomy of the Local Church), a tahsan jouse thempu hina (Priesthood of all Believers), Houbung nit dinga thupeh ni (Two Ordinances of the Church - Baptism and Lord's supper), mihem changval sochatna (Individual Soul Liberty), a tahsan ho (Baptized) houbung mi hina, (Saved Church membership) Houbung vaipo ni (Two officers - Pastor and Deacon), Houbung le sorkar kitimat lou na (Separation of Church and State)

Mainline Church

Mainline Church or mainstream church tia kihe hohi America gamsunga hung kipan ahiuvin amaho chu American Baptist Church, Presbyterian Church, Methodist, Anglicans, Lutheran kitiho hi anahiuve. Amaho hin Evangelical faith hi vannoi ah ana polut uvin ahin tuni hin amahon hiche ana hopjal u evangelical faith a konhin agamlha deu deu tauvin ahi. Ahin, amahon anapeh houvin vang hiche evangelical faith hi akisip tup jing nalai uvin ahi. Vetsahna in, ABC hi tunin liberalism leh modernism theology in nasatah in alonkhum uvin, ahin, Gospel anapehson hou CBCNEI noiya kikhai

hombang tunichan in evangelical faith hi ikisip chah jing nai uvin ahi.

Baptist Jatchom Chom:

Tahsan thuhil, houbung kivaipohdan, chuleh achesa thusim (history) ivet teng tulai baptist hohi jat li (4) a hopkhen thei ahi: Fundamental Baptist, Liberal/modernist Baptist, Ecumenical Baptist chuleh Evangelical Baptist.

Fundamental Baptist:

Kum jabih 19 leh 20 laichun mainline Church ho sunga liberalism leh modernism ahung lut jep jeptan ahileh baptist tia kiminvo houbung phabep chun hiche khangtouna thah houbunga hung kipolut hochu ana pomthei pouvin chuleh khangtouna toh hung vahlut tha higher criticism or historical criticism chuleh social gospel tiho ana pomthei loujeh uvin tua Fundamental baptist tia ihet houhin baptist kiloikhomna len chu ana dalha uvin ahi.

Liberal or Modernist Baptist:

Mihem ahung khantou cheh cheh toh kilhonin, nitin in thilthah thah mudoh be leh kholdoh be ahijing tan mihemte hetna jong akibe jingin ahileh Baptist houbung sunga jong hiche khantou naho hin tahsan thu kihilna leh houbung kivaihomna a ahung kijeplut lut tan ahi. Hichea kon in Bible interprete kibol naho a jong leiset chihna, hetgilna, kholgilna a Bible ledoh ding hi nasatah in ahin chepi tauvin ahi. Bible jengjong apumpia Pathen thu hidingin ginchat lelina ahin neipan uvin, Bible hi lekhabu dang ho banga sim a le ding ahi atiuvin ahi. Hichea kon chun the Bible contains the word of God (Bible

a Pathen thu ajauve) atiuvin ahi. Amaho hin higher criticism nasatah a (extreme) achepiu toh kilhon in Bible a thil kidang (miracles) hojong ginchat lelina anei uvin, khonung thu jeng jong apom thei behseh pouvin ahi.

Evangelical Baptist

Tunikho hin Baptist jatchom chom aumtoh kilhon in Baptist insung jeng ajong evangelical group aum in ahi. Amaho hin Baptist te tahsan le chena lhongpi apom uvin ahin achunga kisei fundamental le liberal baptist hotoh kibahlouna tamta anei uvin ahi. Higher criticism achepi vang uvin Bible inerrancy leh infallibility (Bible a adihlou aumpoi, adihlou thei poi) apom uvin chuleh Bible hi Christian khat dinga chamkim set ahi ti anom uvin, ahin Bible kisut jou a kipat in thil kidang (miracle) or Pathen kiphonna (revelation) ho abei tai tihovang ahasei pouvin ahi. Tahsan vanga sochatna apom uvin, Jesu tailou lampi dang aumpoi ti apom uve. Tahsan chankhomp hotoh kiloikhom ding anom uvin, a tahsan louho athe deh pouvin ahi. Pengthah na apom uvin, thokitna atahsan uvin ahi. Chuleh, mission leh evangelism hi Houbung tohd-ing thupi pen ahi ti apom uvin, aha khohsah uvin ahi.

Ipijeh'a Evangelical Ecumenical Baptist?

Ecumenical/ecumenism kiti hi Greek thucheng oikoumene kiti apat kilason ahin hichu "mihemte chenna leiset pumpi" tina ahi. Hiche hin atop chu leiset pumpia chengkhom khat ihi bang uva Houbung hojong Gospel thupha lhangsap

na'a kiloikhom ding, kipumkhom ding chu ahi. Protestant missionary ho vannoi mun chom choma mission na atoh nauvah doctrine leh denominational line a kichomkhen naho jeh in mission natos machal mona nasatah ana umtan ahileh 1910 kum in Scotland gam a Edinburg khopi achun koi denomination umlouvin protestant missionary mi 1200 ana kikhom uvin hiche nikho chun hiche ecumenical movement hi ana pengdoh in ahi. Hiche ecumenical in atup pen achunga kisei banga Pathen thu'a Houbung ho kiloikhom a kipumkhom ding hi ahi. Ahin, phat chomkhat jouvin, hiche Ecumenical movement hi liberal holeh modernist hon ahin lonkhum uvin houbung ho kiloikhomna dinga ana kiphutdoh World Council of Churches (WCC) jengjong ahin lonkhum tauvin ahi.

Tunikhon WCC in ecumenism hi aval/extreme in achepiuvin Muslim, Hindu holeh thilsem dang hojong ahopsah uvin ahi. Hichejeh hin mi bangkhat in WCC a kona Anti-Christ hung kispeng ding ahi ti chan seijong aumkit in hiche jong hi seival ahin hetna lhahsam jeh leh kholgilnavat jeh a kisei mai mai ahijoi. Tuni kho hin baptist insunga jong tulai liberalism/modernism ho pomdan toh kibanglou leh extreme a chepi louva, ivel a um houbung hotoh kiloikhom a Pakai lengam'a panlah khomding chepi aum jingin ahi. KBC injong lamkai masa hon motto a UNITY kiti anakoi'u banghin tuni chanin tahsan leh lungtup kibahpi hotoh tahsa leh lhagaova kipumkhom a kiloikhom ding ichepi jing uvin ahi. Hiche hi evangelical hon achepiu leh apomdan uchu ahijinge.

KICHOH IN

KICHOH IN



Vetnom umtah 35th KBC Men Department Assembly cum Gospel Olympic 2015 Disk chu 4th August 2016 nichun Rev. Ngamjapao Haokip, General Secretary, KBC in hondohna aneitan ahi.

Kiman tah in ahung kijoh in, hiche Disk hi nachoh leh Men Department Pathen natos na a nang jong pan la khat nahi ding ahi.

KITHA KIMAT JONA

(OVERCOMING VIOLENCE)

Micah 4:1-4; Matthew 21:12,13.

REV. DR. THONGSKHOSEI HAKOIP

Tulai vannoi leiset mun jouseah kitha kimat hi asokeo hilouvin niseh a pungtultul danin akimutan ahi. Adeh in eimite itam chennau Manipur gam neocha sungah hin anidan tin leh aphot tinna thilsoh jing dana aumphant in angaina in achetan, masang a banga tijatah leh kidangsahna aumthei tapon ahi. Hiche hin ichan gei dinmuna um ihitah uvem ti kicheh tah in aphochen e. Alang khat ah, kitha kimat jona teidingin vannoi muntina Christian te khohsahna khat chu ahiye. Hijeh chun hiche thupihi tulai eimite dinmuna dia jong poimotah leh ngaichatah ahitai. Kitha kimat (violence) chu ipi hiya, iti hungkona, Christian te mopohna ipi hiya chuleh ipi loa suhtang/jona nei thei ding ham ti boipi angaitan ahi.

Kitha Kimat (Violence) ipi hiya iti hungkon ham?

Violence hi eipauva ileдох guot teng le alhing lal jep in, sap pauva abulhing jep in akihen ahiye. Violence kiti thucheng hi Latin pao 'violare' a kona ahin, hichun hunam (force) tina ahiye. Violence hi hunam ahin, thil suhsetna lampanga kimang 'kitha kimat' tina ahi. Athucheng kimanna dang dang ho chu: thudih leh chonphatna dan palkeh na natoh, midang nei le gou iya se louna natoh, mihem ho pamsena, suhnemna leh milouva gelna natoh, mihem lunggel khat chu midang lunggel chung a thanei sahna natoh (Niebuhr pomdan), midang chung a kithanei sahna natoh, chuleh ipi hijong leh mihem dang chunga noisena, pamsena, athaneina lahpeh, mankhelna (abuse), tahsa

a suhsetna tiho ahin, alhangpia het dingin a mihem hina suhsetpeh (violation of personhood) chu ahi.

Kitha kimat hi chichom chom (types) aume. Hiche hochu – chondan-khendana a kitha kimat (socio-cultural violence). Tekahna a pasal thuneina noiya numei chan neisah louna leh mihem te kibahna jahda dangdang; Deidan/Pomdan kibah louna lampang a kitha kimat (ideological violence). Tekahna a nam khat leh namkhat, phung khat leh phungkhat ahilouleh sakho lampanga ngaidan kibahlou jalla adang ho aumlouva gelna; Inchen le sum le pai lampang (economic violence). Tekahna a tulai vannoi chena dola globalization khanga mivaicha ho gelkhohna lhahsam; Adang dang tichu – kivaipona (political), thilsem dang chung a

(environmental), tulai khantouna (technological), ti leh adangdang ho ahiuve.

Kitha kimat hung umje chu lhangpi nun a thu adih a kitanlouna (social injustice), sakho lama chevalna (religious fundamentalism), ama phung leh chang or nam bou geldohna le khohsahna (ethnic/clanish consciousness), lung neona chuleh achung vuma mihem lhinalna ahiye. Khonung ding leh vanlam muchen louna chun hitobang kitha kimat hi asosahji ahiye.

Kitha Kimat hi suhtang thei hinan tem?

Chunga kisei chichom choma kitha kimat ho eiholah ah aume ti imukeovu hilouvin eiho jong hiche lah a chan ineiyun ahiye. Imauva thudoh khohtah khat chu: kitha kimat hi kisutang thei mong nantem? Mihem thilguonna a kona hithei dia ginchat umlouna bidoi le natohhi isuhjom nah lai diu ham? Micah 4:1-5 sung thuhil hi eiho dia totho dia kouna ham ahilouleh imopohnau leh itoh diu ei geldoh thahsah u ahidem? Ahilouleh Pathen dia bou hithei ahijalla ama natoh leh thilguon bou nga a itou thimbeh diu hitam? Ahilou jong leh hiche teni kigoma natoh naleh nga khom chu phantem? Hiche thudoh hohi baicha denga donbut hahsa ahiye. Mi kimkhat chun hitobang chaang hohi vannoi leiset kichai jouva phat thah hung lhuna thil jouse kisemtoh nadingin agel un/ aheuvn ahi. Thulhunluibu ivet a ahileh, them-

gaohon hitobang kitha kimat hohi ajona ding lampi hoitah in amu uve. Achedan chu ahileh thina manchah hochu hinna manchah a kilehei nachu ahi.

Chutengle mihon achemjamu tucha akikhen uva, Atengchau jong kangkuiya akikhen diu, Namkhat in nam khat douna dinga Chemjam alap louhel ding ahi.

Hiche thudola ngaitah a thukisei chun vannoi leiset a mihemho cham nale lungmonga ahin khom diu phat aseiyin ahi. Amahon chuni teng chuleh Pathen tah khatseh chu ahet doh diu, Pathen in amahoa kona ipi angaichat em ti ahol diu, kinel baotam suhlhap na dinga gaal amanchah tahlou dingu ahi, ajeh chu Pathen chun namtin jouse chungah thutan na anei ding ahitai. Mihem ho chu ama gam cheh a nomsatah a cheng diu ahitai. Christa jallin hemto chemjaam leh thal hochu chamna manchah a kikhel thei ahi ti itahsan uve.

Hitobang kitha kimatna a galjo nathei lhagao lama manchah hochu gollui laipeh mihon bou aneiyu ahipon, eiho phat majep a India sunga mimasa ho jong ahiuve. Tekahnan, America gama mivommikang kitthetto lou nadia lamkai Rev. Martin Luther King, South Africa a Nelson Mandela, chule eiho India sung jenga jong umdalou ahiuve. "Nampi Pa" tia kihe Mahatma Gandhi in jong India chamlhat galsat na a manchah a ananei chu ahimsa, hichu kitha kimat panglou-

va (non-violence) natoh chu ahiye. Tulaiya eimite chamlhat galsatna manchah a dia ngaicha pipen khat chu ahitai.

Kitha kimat chun asanga sangjo cheh ason, akichaitih aumpon, galjona aum ngaipoi tihi kicheh tah a ihet chenu angaiye. Hichehi mimeipo/mimeidap ho manchah ahibouvin, mihangsan hoa ahipoi. Hitobang mangcha hochu lunggel pilhing lou leh khangtou lou vet-sahna ahiye. Kitha kimat ache jing laisea society sung keh cheh cheh ding, kito tah sanga kibung khen-na leh thalhomna soh cheh cheh ding ahi. Hichun aiti a machaalna leh khantouna chuleh midang toh kibahna a eipuilut louhel dingu ahiye ti kicheh tah a ihet keovu hilouva inatoh uva ipodoh dingu ahiye.

Mi kimkhat chun abidoi adih/hoi pou leh ipipen kimangcha jongleh aphatsah loi jong atam dapouvin ahiye. Ahin, hichea het ding chu, tup khat doi khat muna dingah abolje dan (means) jong abidoi toh kibang cheh a lu ahigel lhonne (The means is as important as the end). Christian te Ngaidan ipi ham?

Christian ihinauvah, kitha kimat jona ding khohsahna chu vannoi leiset a Pathen natohna a mihem ho chan neina a kingamah ahiye. Christa hettosah nadinga thil poimotah chu ahi. Kitha kimat jona dingah chun Jesu Christa eiho vetjui phapen ahi. Thulhunthah bua hin Jesun hou in asuthengna natoh imu uve. Abang kah leh mi loikhat in hichea

Jesu natoh na pansa in kitha kimat phatsahna nei loi jong aumdapon ahi. Matthew 21:12 na ah chun hitihin akisunne:

Chuin Jesu houin'ah alut'in houin sunga thil johho le thil choho abonchan anodoh-in, chuleh sumlheng ho dokhangle vakhu johho touna chu alekhup peh-in (ahi).

Jesu'n hitobang abol hi violence a simthei hintem? Ahipoi, ajeh chu Jesu'n thudih le chonphat tena chu asukeh pon ahi. Chutah sangin houin sunga houlamkai hole kivei mihon kho helouva Ama (Pathen) houho chung a violence natohna aneihou suhtang agot joh ahi. Tuhin Jesu ilah uvah umhen lang hileh Pathen loupi sah nading hilouva ama chang kivah choinom holeh Pathen min mangcha a kinehhol nomho dokhang alekhup peh ding tahsan aume. Hijeh chun, Jesu lam veu hitin kitha kimat chung a galjo nadinga ama'n eikomu pehnau lampi ah cheu hite. Hiche nadinga hi lampi thuma ibol theiyu ahi:-

1. Kiphinna (Protest):

Kitha kimat na chu ima bol louva moh thoh or vet thim chu Christian te dinmun ahipoi. Kitha kimat akidoupi (opposite) chu thudih umna thei dia natoh chu ahi. Jesun thudihlou amoh vet thim poi ti iheuue. Jesu natoh chu lampi nia hettei hinte. Khatna, sumlheng ho dokhangle vakhu johho touna chu alekhup peh e. Matthew lah danin, hiche thilsoh hin hou in le amite chung a Pathen thutanna hung

lhungin angaitoe. Anina ah, not thap le pampaia umte – mitcho, el-bai, chuleh meithai-chagate Jesu'n aliemin asang uve. Kitha kimat umna chu moh vet ding hilouva, hiche douna a kiphin ding angaiye. Ahin, hiche kiphinna hi bandh bol-la miho leh anei angau ima suhset ahiloule suhboipeh kitiho ahipoi.

2. Bol gentheiya umho thoh huna:

Taona a igeldoh jengseh u hilouva amaho genthei thoh khom pina a thudih kiphonna ding gal-sat khomna neiding ahi. Christian te kimkhat chu midang agenthei teng leh amaho hoidoh a aumjallin Pathen thangvahna aneyun ahi. Genthei thohho dingin ikam mai-maiyu itoh un, taona a geldoh ding bouvin iseyun ahi. German gama Hitler soset lai yin mikhat hitia an-agel phondohna ananeiyae:

Mihon Juda mi athau chun
Juda mi kahilou jallin khoh kasapoi

Communist ho athau chun
Communist kahipoi tin khoh kasapoi Catholic ho athau chun Catholic kahipoi tin khoh kasapoi Keima that a ahungu chun eikhoh-sah ding koima ana um tapoi

3. Semphat nadia panlahna:
Kitha kimat hung sodoh nahi mi-hem ichana chonse hitam ti tahl-anna ahi. Kitha kimatna ngahna ding/jona dingah kisahna neiya Pathen lama kiheilut naleh Pathen lungdeijoh holding angaiye. Van-noi leiset abungbua khel nadingah hinkhoa gellut dingho kheltoh/suhtoh angailleh jenge. Baitah a kikhelna hungpot ding vang gin-chat aumpon, thisan leh ulsa chul-eh mitlhi longa panlah ngaiyah ahiye. Chutia khohsah tah a ipan-tengu leh Pathenin jona eipeh tei diu ahiye, ajeh chu amatah in “van-noi leiset kichaini geiyin kaumpi jing nauve” ati. Pathenin asim jouse anapha tongdoh dingin phatthei boh taken.

**KBC Thuso
1980 October
issue
Songjang
Baptist
Church KBC
No. 16 mun a
ana kikoi tup
jing nalai.**



LHAGAO MANGHO HUHDH'U HITE.

*Rev. Ch.Chungkholet
Retd. Pastor KBC.*

Literature & Publication

"Pathen chu Lhagao ahi chule ahouten Lhagao le Thutah a ahounding mong ahi" John 4:24.

Pathenin ama lim le mella mihem asemma, ama lim iputna melso chu lhagao thutah hi ahin, Pathen deija chonna dnga kona eipui manguva chu satan chun Gul amanchah'a Pathen thusei palkehsahna aboldoh sah chu jouthei lhagao chu ahung hitai. (Gen. 3:1-24).

Hiche jouva pat chun mihem'a hin lhatah le lhajong kiboitah in aumkhom tan ahi. Ahivangin chonset chu hiche hi ahin chonphat chu hiche hi ahi kitia kiseikhenna ahung umdoh phatnin michonse joh chu kana hitan mihemte hi ina hitaovin ahi (Rome 7:7-24) ven simin.

Lhagao thutah hi Lhajong (jouthei) hin damunna kipah theilou hella eipuilutnu ana hitan hiche jeh a chu damun mi ina higam'u ahitai. (Ohe.... migenthei tah chu kanahi. Hiche thina akonin kojijin eihuhdoh tan tem ? l-Pakaiju Jesu Christa vangin Pathen kathangvah'e (Rome 7:24-25)

Mihemte hi chonset mijoh chu ina hitaovin chonset ihetchet theina di-uvn danthu asele apha hetkhenna ding ana umin ahivang chun chonset dalhah jouna ana umdeh pon, Mihemin asele apha akilhenkhen thei tapon anahi.

Galatian 4:4-7 "Phat alhin tah in danthu noija umho lhatdoh dingle eiho chapa lamthu ihitheina dingun Pathenin..... achapa chu ahin soltan Chapa lhagao ilungsunguva aumphatna soh kihi talouva chapa kihi a Pathen goulo ding kihi ahitai" Halleujah !

Somasa a chun danthu in chonset ahisah ho alim phabep isundoh taovin, sonina a chun i-Insungule i-houbung sunguva chonset boljingnalai ho achangchek anahil chetna napuidoh ijat um em ti chan gei iseikit taovin, tuni achaina penin Pakai Jesu lhagao neina tilouvin chonsetna konin aki-pot doh thei poi ti hetchesah cheh ding Jesu Lhagao thutah a iki lahlut tengleh hiche Jesu Lhagao vang bou chun chonset gal chu kijouthei ding ahibouve ti isei'u ahi. Hiche eima lhagao thutah a Jesu (Huhhingpu) tahsan tah a kilah lutna Jesu lhagao kilamkaisah ho bou chun chonset gal ajothei ding bou ahi.

Tulaijin houbung athah phudoh dingjong alhomtah ihoubung sun-guva houbung member ho lah a tahsa ngaichat suhbulhitna dinga houloi ajat jat atamtan alhagao thina ding kihet theilou atamtan hiche ho huhdoh din katohkhompi houlamkai mipengthah hon gelk-hoh tah in pantao hite.

Q.1. Ikiloikhomnao Kuki Baptist Convention hi ipi natong dinga kiloikhom ihuivem ?

Ans: Lhagao mang huhdohna dinga.

Q.2. Gambih a ibolla iki hopkhen uham ?

Ans: Pastor hon Pathen deija lungna chim tah a Lhagao lam na atohtheina diu.

Q.3. Houbung boldoh lou ak-hohna ipi ham ?

Ans: Jesu tahsa mel (lim) thodohna ding.

Q.4. Michangcheh a Jesu Lhagao nei tei ding angaina ipipen ham ?

Ans: Tonsot dammuna umlouna ding, tonsot nopna vangam'a umna ding.

Pakai Jesun aseina a John 17:12 "Keiman amaho toh kaum laija neimin pehna minna chu amaho hi kanahon ahin, amahohi kahongin khatcha jong amangthah aumpouve mangthah chapa bou chu amangthah tai".

Pakai Jesun aseina banga hi navaipohna sunga amangthah umlouhel ding hinam ? Ole amangthah ding jeng jong hedohlou hanim ? Pakaijin atong dia einganse laijuhin kivephaote. Pakai anga mo ichan louna diuvin chule Pakaija kipaman isanna diuvin Pakai lenggam machalna dinga kaseina a seikhel aumle Pakai minin neingaidamun lang kitilkhoutona in neisan peh un.



Pathen lungset in tu nailamcha chun KBC in Bolero khat akilamdoh toh kilhon in Nisim 20 July nikhon in KBC President Rev. Dr. Hawingam in KBC Head Office munnab Pathen heng a lhandoh taona anamang tan ahi. Pathen thangvah in umhen.



Mission field apat lekhathot



Tu a lim kahinthot lhon hi English student ho ahin Monday to Friday afternoon a pungkal khat English kahilji lhon a, every Wednesday le bible kasim khompi ji lhon ahi e. Tu a lim hi bible asimpet'u ahi e. Student 4 lah'a hin tuhin mini hi regular in sunday worship a ahungjau lhontan, eiho Pathen ahin tahsan theina diuvin taona ngaichat ahi e. Chuleh tutu hin part time school kahong lhon in Pathen jal in student mi 8 kanei lhon tai. kakipah e.

Lhingneikim and Ngaineichong
Cambodia

PATHEN THANGVAHNA/KIPATHUSEINA

1. Wangjing Meitei Church a natong Pastor Mangkholen Kipgen akon thulhut kimu dungjuijin achesa lhasung in Pathen Oithah mi 4 aumben, Pathen thangvah ute. Ama ho chu :
1. Bondud 2. OM Meitei 3. Mrs Sarju 4. Mrs Shanti ahiuve.

2. Manipur Nepali Field a Supervisor Rev Jeetan Gajmer akon a thulhut kimu chu ahileh achesa lhasung in mi 6 in Twilut abol un,mi 11 in penthahna aneije. Pathen thangvah ute.

TAONA NGAICHAT

1. Rev.Ibomcha Minipur Meitei Mission Field Supervisor akon a thulhut kimu diungjuijin, Samurou Mission Field a Missionary Evan. Manglenba Singh ama sopi Christian hilou hole khosung mi phabep in Hou Inn sah ding aphalpeh po'ugin, chule akikhop nao jong asuhboi peh jinguve ti lhulhut akimun, taonan kopjing ute.

EPIDING A KEIPENTAH?

Leiset chung a aching, athem, ahoi, abolthei, ahaio tamtaum e. Phat khat2 tengleh "kabolthei la aumpon, emala kaneipon, epid-ing a pathen in hinna eipeh ahidem?" Tia nakigel khah em? Henge, eikigel nau tamleheh inte.

Kei jong nikhat phatah in kakigel in, mibang inla boltheina nei ka-hipon; music, dance, teaching, sappao etc la kathampon, Pathen in epi ding'a kei pentahhi amangthai lah ah natongding a eikou ahi dem? Ki jumsoding, jahchat thohding bep kahi dem? Tin kaki gel e.

Ema hilou ah kakigel laitah in John 9:1-12 a eikihou lim pi in, sei-juiten Jesu kom a hiche mitchopa hi anule apa jeh ham ahiloule ama chonset jeh a mitcho ham tin ana dong ui. Hinlah Jesun anule pa jong hylou ama chonset jeh jong hilou in Pathen natoh ho kip-hon nading ahi ati.

Ka nulepa chihna le thepna vang hilou, kei bolthei nale chih navang hilou in, pathen loupai kiphon nading a aching athem hi jat lah a mimol pen nu alhen'a, thil bolthei hijat lah ah bolthei loupun nu alhen a, aseitheh hijat lah a aseitheh loupun nu alhen ahi ti kichen tah in eiki geldoh sah e.

"EPIDING A KEIPENTAH" ti thucheng hi kaha man lheh in ahi. Ahin hiche "EPIDING A KEIPENTAH" akon kasei nom penchu ahile Pathen in ima lou hojong amang chanom e. Nangjong hitabong'a nakigel

na tamlheh inte hinlah Mose bang'a nakoupa thu nanit pou pou ah ama tahsan puma kal nason le "KEIPENTAH" jong ama loupi nadia eimanchah thei uh ahi. Elkou pau Pathen in eihe chen mama uvin, ejolou diu le ebolthei loudiu eipe povin ahi.

Hangsan tah in KEI PENTAH jong pathen in eimang chanom e ti geljing pum in Pathen Adin pang jing u hite. Asim jouse pathen in eihoulim pi uhen lang phatthei eiboh cheh tauhen.

Kakipah e!

Keima

Ng. Ngaineikim Haokip

Cambodia Ms. Field

CHRISTIAN EDUCATION COLUMN

CHRISTIAN EDUCATION

DAY

Christian Education Board Table a kipan in Pakai lengpi leija tokhompi muntin'a um Houbung mite, chule Lamkai jouse CEB ten I-Pakaiju Jesu Christa min in ngailutna Salam kahinpeuve.

Tukum a jong 'CHRISTIAN EDUCATION' nikho ahung lhungding September 11 (2nd Sunday) nileh Events Calendar dungjuija imankitdiu ahin, noijahin KBC Education Board in anikho'a Kimanchahna ding Program ho, Taona ltem ho kahin tahlanguve. Chule tunia Education Board in Houbung mite henga kahin ngehnom pen u chu ahileh hiche nikho hileh Pakai lenggam machalna dingin Collection hoitah in bolcheh-u hitin, itodoh jat hou KBC Office lam'a hungthah cheh uhite. Ajeh chu achesa Kum'a Report ho akivet leh Houbung Offering Office lam'a hung thah akitambehp'o'n, hijeh chun tukumin vang KBC Houbung jousen

anikho'a Prog. lolhing tah'a ikimancheh utoh kilhon in hiche nikho'a itodoh jat jat u chu Office lam'a kimkeijin hung thah cheh ute tia Pakai min 'a avel'a kahintemu ahi. Ajuh chu hiche bou hi kimangcha'a Pakai lenggam na itohkhom u ahi.

Chule abanjom in Sept.18 (a next Sunday) nijong khu Kanggui Christian College 'DAY' ahikit in, Christian Education Board mopohna'a um ahijeh in atum'a Program ima hung kistem hih jongleh Taona le Thilpeh(Collection) neipeh cheh din kahin temuve. Kum 10 val'a ihinboipi jing u, College khatseh cha ineiju hi kithang atpi umtah ahi. Hinlah ahina ding banga isemdoh theilou laiju hi phamo akisa l'eh jengin ahi. In sahban ho kisachai henlang, Furniture kilomdeuvin kikoi thei leh, Class jong hoitah in kilajing thei leh tih lamkai tampi lunggel leh pohgih khat ahijingin, KBC Property khat semhoina dingin nangma/nangho Houbung khohsahna leh pan lahna ngaichat ahijing e.

KIMANCHAHNA DING KIN-GONTOH

Thupi:- "Ama'a chu Chihna le hetna Gou jouse kisel'a ahi"(Colosia 2:3)

Houkhom lamkai : Sunday School Supdt.

Thangvah taona : W/Dept Chairperson

Vahchoi labung : BYD, etc.

Offering Thenso : Pastor/Hd Dn

Thupi : Pastor/Hd Dn/Guest Speaker

Phatchaina tao : Mipi, achai ding-Houbung Secretary

(NB – Eima Houbung cheh a Prog anopna theija kistembe thei jong ahi).

Taona ding'a deisah point phabep ho:-

i). I-Namsunguva, adeh a KBC Houbung mite lah a ichateuvin Themjilna lam ahinkhohsah jinguva, khangthah lekhatem, aching lamkaipha tampi ahung kispdoh jing theina diuvin taovuhite. ii). Manipur sunge mun dang dang'a (Gamchoum'a) ichateu Themjil, Service bol ho taopeh ute.ai ho jotheng a

iii). KBC ten Institution ineisun'u, Dr Colvin High School Moreh leh Kanggui Christian College, Kangpokpi pilhing tah tah isojoutheina dingu, chule College a Building sahban Jotheng'a aumtheina dingin taovu hite.

iv). Christian Education Board in Convention le Pakaija dia thilphachom tampi ahin tohdoh theina dingu, chule I Houbung tin'uva khangthah hon Themjilna lam(Education) ahin khoh sahjinguva, jatdang mikhang touho dinmun ahinphah joutheina dingun Taovu hite.

FINANCE COLUMN

FIXED DEPOSIT THUA HETSAHNA LE TEMNA.

Amasapenin Jesu Christa minin kajana Salam kahinpei. Achesa KBC Annual Assembly Res.No.12:63:2016: Recommendation No.3 dungjuija 2016 a pat kum 5 (five years) sunga Fixed Deposit boldingin kiphatsah na ahitoh kilhonin anojja hin kahin tah lange.

1. Centre Church alenloi : Rs. 5,000/-
2. Centre Church aneoloi : Rs. 2,000/-
3. Local Houbung member 100 chunglam ho : Rs. 2,000/-
4. Local Houbuang member 50-100 ho : Rs. 1,000/-
5. Local Houbung member 50 noilam ho : Rs. 500/-
6. Individual a koitobang Rs. 1000/- chunglam donate bolnom aumle Certificate peh ding.

Chunga kisei rate hi nangma Houbung cheh in phatah'a navet'uva, ageipen a September last week masanga KBC Office mun'a nahin peh cheh diuvin Pakai minin kahin tem'uve. Pakaijin phatthei naboh taohen.

Rev. Letpu Kipgen,
Finance Secretary, KBC.



One Day Finance Consultative Seminar

C. Aisan Baptist Church KBC No. 3 mun a nisim 29th July 2016 nikho in Rev. Letpu Kipgen Finance Secretary pu lamkai na in ana kibol in lolhing tah a ana kichai tai.

Resource Person in Pastor Henkholen Kipgen leh Pu Khaijang Haokip Senior Auditor ana pang lhon in ahi.

WOMEN COLUMN

Kipa thusei nale report

1. Achesa nisim 16/07/2016 Saturday ni hin KBC C/C New Lambulane G/ No. 1. Women Department mophna in Pastor pale Secretary pa jaonan mi 22 in Lydia Centre vilna ahung neijun, Chule Gambih No. 8 Pastor Rev, Than-



glen jong ahung pangin, Pastor Onkho Haokip in Lydia umho Pathen thua tilkhouna aneijin Pathen henga taopeh na jong aneijin, Nute ho a konin kithopina sum'a Dk 15, 750/- (Fifteen thousand

seven hundred fifty) only le thil a Anchang 46 kg, sangkhol-11, Toka -6 chuleh ponchen (Nih) -6 ahinpouvin, achunguva kipathu Pakai minin Nute jouse thalhengin ahung kiphonge. Pathenin C/C New Lambulane Nute ho mapan a jong thilpha tamtah tong jou jing dingin a kiloi khomnao phat thei bohjing taken.

2. T. Champhai Baptist Church, le C/C Tuibuang KBC No. 8, Houbung mite hon Lydia Centre a um chate naote ho Warden nu Lamkai na a Hou in kai phat mun napeh uva chu jongle taopeh na le tilkhouna a kipa thilpeh sumle pai hihen Anchang hijongle nahinpeh hou jallin nachunguva kipa thu ahung kiseije. Pathen in Houbung mitejouse alenggam napha tong jou jingding phat thei boh cheh tauhen.

3. KBC C/C Hill Town le Tuinom B/Church Gambih No.9 Houbung tenin jong Lydia Centre ngailutna jalla asunga um chate ho tilkhouna na a Hou in kaikkhom pina phat mun khatvei cheh nana gonpeh uva achele ahung kile na jenguva jong boilou hel a nana ngaito peh nao le nataopeh nao jallin nachung chehuva kipa thu ahung phonge. Pathenin malam a hitobanga pan lakhom jing dingin phat thei naboh cheh tao hen.

Achainan, muntin a Houbung mite hon Nuten tohgon lenpen a inei u Lydia Centre lolhin na dinga taona le thilpeh a pan nahin lah jing jallun imachal jing un, Pathen phatthei boh na ani ania simthei dingin aum jing theijin, Tuni chan geijin Lydia Centre visit hungbol a taopeh na le thilpeh lamchom chom'a hinchoija, chate gelkhoh na jalla kal hinsong lut jouse Pathenin phat thei naboh jing taken. Kakipah e.

Pakai lhacha,

Lhingjanem Haokip, Secretary Women Department, KBC



ROUND 1

Youth Department, Kuki Baptist Convention in ahin bolpi jing Zai-Them 2016 chu achesa nisim 16 July 2016, Saturday nikhon Imphal toulpi KBC Head Office mun'ah loupi tah in Audition chu ana chelhatan ahi. Hiche Audition a hungpang Zai-Them kitetna'a pangho titah louvin Houbung lamkai, Gambih lamkai, Youth lamkai chule Gambih le Centre Church Pastor phabep jong thanom tah in pan ahung lauvn, kipana seijoulou akip-honge.

Pathen in damna eipeh uleh ahung lhung ding nisim 19 August 2016, Friday nikho jinglam nidan 10:00 tengleh Sadar Hills Gamkaiya KBC Centre Church, Kanggui mun'a Zai-Them 2016 ROUND 1 (Elimination Round 1 tia jong kihe) chu kipan ding ahitai. Hichea hi Zai-Them 2016 Audition a lolhing jousen pan ahung lahdiu ahin, sun nilhum'a kitena umding ahi. Chuto lhon chun nilhah teng jong le lasathem ho a kon'a Pathen vahchoina lasah kingaiya, Zai-Them 2016 ROUND 1 result jong kiphong ding, VIP a jong kineppi umtah mi phabep jong kikou ding ahi. Muntin a nulepa, pilepu, khangthahte, apangnom jouse akilem in, pan hungla dingin temna sangpen kahin nei uve.

Youth Leaders' Seminar

Assembly a kiphatsah na bangin Youth Leaders' Seminar hi tukum sunga dinga 2 vei bolding ana kiti chu khatvei ana kibol in lolhing tah in ana kichaitan ahi. Hito lhon chun a niveina le achaina hi ahung lhung ding nisim 16 August 2016 Tuesday, jinglam nidan 10:30, KBC Chapel Hall, Imphal mun'a bolkit din akigontan hijeh chun Gambih le Centre Church jousea Youth Chairman, Secretary le Treasurer thonlouva hungpang teitei dingin temna sangpen kahin neiyee. Hiche kin a dinga hin lekhatthot jong akihung neitan, aphot le amun ana kikoi haina chungu hin ngaidam akithumme.

Youth Employee Day

Tukum Youth Employee day hi ahung lhungding August 28, 2016 Sunday nikho ahung hitoh kilhon in muntin a KBC houbung jousen neina nitpeh diuva Pakai min'a temna le taona kahin nei ahi.

Hitoh lhon chun KBC khangthahte lah'a Houbung sunga natohna nei jouse jong Pakai lhacha hon taopehna neina neipeh uva, natohna phapha, ahoihoi le asang sang hinmu jong akibejing thei nadin taopehna neihin neipeh diuvin jong temna kahin neiye. Chuto lhon'a KBC Youth ngailutna jalla tolom jong neihin donpeh cheh diuva jong het-sahna le temna kahin neikitne.

CONDOLENCE

LUNGHEM PI NA



1937 - 2016



Nl. Vahjihat Haokip, Rev. James Jangkholen Pastor Gambih No. 2 anu in phatsot tah tahsa dom lou na jeh a ana kijen chu damjou talou vin Nisim 7 July 2016 nikhon achenna mun Sinam kho munnah aleiset hinkho ana lha tan ahi. Adalhah ain sung mite lungjinna chu Convention in jong pohnat pina ahung kiphong in, Pathen in lungmonna petau hen.

Finance and Theology Seminar

Achesa July 9, 2016 (Saturday) nikhon KBC Finance Department leh Shalom Bible College kithokhom in New Keithelmanbi B/C muna One Day Seminar on Finance and Theology ana kibol in ahi. Hiche seminar mihil in Rev. Letpu Kipgen, Rev. Silas leh Pu Lenboi Singsit anapang uvin ahi. Rev. Lamkeng Lhouvum hapan najal in Gambih No.7 sunga houbung tin a lamkai atamjo ahung pang uvin seminar lolhing tah in ana kinei in ahi.



Seminar on Issues Facing Christian Today

Shalom Bible College in sponsor abol chuleh Gambih No.8 toh kitho'a organise abol lhon One Day seminar on Issues Facing Christians Today chu B.Vengnom C/C muna nisim 23 July 2016 nichun ana kimang in ahi. Resource person in Rev. Silas leh Pastor Onkho anapang lhon in, Gambih no.8 sunga houbung mi leh ajet avel a houbung danga kon mi 200 val ahung kikhom uvin ahi. Pathen mapui na in seminar lolhingtah in chai anahin ahi.



Temna leh Ngehna

Houbung mite henga kahin seinom chu ahung lhung ding August 22 a kipat September 18 changei Shalom Bible College in Salem Sapormeina C/C muna class inei kit dingu ahitai. Tuchunga hi graduate ding mi phabep aum uvin, chuleh athah a hung kaipan ding phabeppi jong aum uvin ahi. Lungset tah in Houbung miten itao nauvah geldoh uhte.

Chuleh, KBC Events Calendar dungju in September 4 (Sunday) nikhoa offering hi Shalom

a ding ahitoh kilhon in Houbung hon khohsahna neitah a offering a imu hou Office langa ihin thah diuvin ngehna kahin neiyeh. Chukitleh, SBC in class hi August 22 a kipan ding ahitoh kilhon paisa ngaichatna nasatah akineiyin hijeh chun amatheipen a Office lam a ihinthah thei uleh kipa umcheh inte. Kakipah e.

Christa Lengam'a dinga
Rev. Silas Jangminlen Haokip,
Director, SBC

KIM, KCLF, KNT leh KSO consultative Meeting



Nisim 29 June 2016 nikho in Kuki Inpi Manipur(KIM), Kuki Christian Leader's Fellowship (KCLF), Kuki Nampi Taona (KNT) chuleh Kuki Student Organisation (KSO) lamkai phabep in Imphal KIM office mun a lunggel ngaito ho leh tulai thu ho lunggel seikhomna ananei khom un ahi. Kuki Christian Leader's Fellowship a Chairman khat hina jallin KBC General Secretary Rev. Ngamjapao Haokip jong agapang in ahi.

ATAL PENSION YOJANA (APY) FOR SOCIAL SECURITY IN INDIA



*Henkholen Kipgen
KBC Development Coordinator.
Ph.no:8730816545*

ATAL PENSION YOJANA (APY) FOR SOCIAL SECURITY IN INDIA

Tunaicha a hung kigongdoh Atal pension yojana kiti hi eithinglhang mi adeh a Government service neilouho dinga thilpha chomtah Centre Government nin ahin gondoh ahi. Hiche schemes thah hi government nin kum 60 lhingten pension sum asan nathei dinga ahin gondoh u ahi.

ATAL PENSION YOJANA KITI HI IPI HAM

Finance Minister Jaitley in February 2015 budget speech aneinachun Indian citizen jousen tehnung teng koima tahsa natnajeh a sumle pajia lungkhamna aneiloning; nehlechah jeh le adang angaikhohjeh a koiman sum le pajialungkhamna aneilou dinga hitai tin anaphongdoh in ahi. Hiche Atal pension Yojana hi June 1 2015 nachu hung kipanahitai. Hiche kibollona pentah chu milham mi Govt. Noijanatahna neilouhon lhaseh a sum lhom cha cha aseuva kumsomgup (60) alhinnuva pat na pension sum akisantheidiuva Govt. Nin agon ahi.

Hichihin avetsah chu kumsomgup alhinna pat soilou a alhom pen a pension lhaseh a (guaranteed minimum pension) Rs. 1000/, Rs.2000/, Rs. 3000/, Rs. 4000/, or Rs. 5000/ munatheidia tohgon ahi. Ahinlah hi-

chi hi athon a pension kipeahideh poi, tua nahatlaia lhasah a Govt. Manchah dia sum ijat nakholjouem hiche chungah chukungam kit ding ahi.

Hiche pension schemes hi private nanatongholeh thinglhang mi nangtongjousen abolthei dinga central Govt. Nin eigonpeh u ahi. Chuleh lhasah a nasumsedoh dungjuia pension teng sum nasan ding ahi. Natam se le natam san ding nalhom se le nalhom san jep ding tina ahi. Nang ham khatchun vangset pi a thina naneikhah tah a ahile najinu/najipa ham chu pension chu aki san kit ding ahinalai je.

KOI CHUN HICHE SCHEMES HI ABOL THEI DING HAM

HicheAtal Pension Yojana(APY) hi Indian citizen jouse kum 18 napat kum 40 channin abolthei ding tina ahi.

Hichejaona dinga hi ajao dingho chun form hoilai bank mun hijongleh akilahthei ding, chuteng form a kiseibanga angaicha jouse chu asuhdima bank a agathah ding ahi. Bank account kihon angaijin, jinei nahile najinu min chule nominee a koiham nakoipen chu abon cha form a najih tha ngaiding ahi. Bank a lhasah a sum gathahngai ta louding, na account a chu sum nakoijingjeng ding hichu bank ngin lhasah a akikahthu ding ahi.

KUM SOMGUP MASANGIN THITAL-ENG IPI TI DING HIATAM? KASUM TO KOICHANG DING HAM?

Kum somgup masanga nathileh na nominee chun nang mina sum chu lumpsum a akilahthei, ahilouleh le nang min a kum somgup(60) nalhinchan sum atojom jingthei ahi. Jineihodin nominee hi ajinu or ajipa ahin, jineinailou hole aji um talouhon anopnop u akoihei u ahi.

ATAL PENSION YOJANA (APY) ACCOUNT A SUM HI ITI KALAH DOH THEI DING HAM?

Hiche hi jat li a khenthei ahi:

1)Kum somgup nalhin phatle bank a kumsomgup (60) kalhing tan ka monthly pension neipetaovin tia lekha khat naga peh lut angaije.

2)Account neipa athitahle ajinu or ajipa in pension alah ding, ani lhona athi lhontahle a nominee in akilah kit ding ahije.

3)Kum somgup lhinmasanga thina atoleh sum kikholdoh jouse ajinu/ajipa or nominee kipe ding ahi.

4)Kum somgup masanga account close (Premature exit): Hiche hi alhang pi a phalahipoi. Hinlah aloutheilou din mun a mikhat in a close nomle PFRDA phalnaa closetheiahina. Hinla koi tobang Govt. contribution mu hovangama to dohjat le hiche sum a konapung(interest)) boukilepeh ding ahi.

Hiche schemes thu a hin tampi seibethei aum min hinlaabon a iseijoulou diuahijeh in hichanhinngaphot nu hite. Hichekalval a hetbe nom nei I um ule bank a ikidohchetbethei u ahi.

Indicative Contribution for various Pension Option

Entry Age	Years of Contribution	Monthly Pension INR 1000	Monthly Pension INR 2000	Monthly Pension INR 3000	Monthly Pension INR 4000	Monthly Pension INR 5000
18	42	42	84	126	168	210
19	41	46	92	138	183	228
20	40	40	100	150	198	248
21	39	54	108	162	215	269
22	38	59	117	177	234	292
23	37	64	127	192	254	318
24	36	70	139	208	277	346
25	35	76	151	226	301	376
26	34	82	164	246	327	409
27	33	90	178	268	356	446
28	32	97	194	292	388	485
29	31	106	212	318	423	529
30	30	116	231	347	462	577
31	29	126	252	379	504	630
32	28	138	276	414	551	689
33	27	151	302	453	602	752
34	26	165	330	495	659	824
35	25	181	362	543	722	902
36	24	198	396	594	792	990
37	23	218	436	654	870	1,087
38	22	240	480	720	957	1,196
39	21	264	528	792	1,054	1,318
40	20	291	583	873	1,164	1,454

THANGBUH BAPTIST CHURCH**YOUTH CAMP LOLHING TAH A KICHAI**

Thangbuh Baptist Church Mission Department toh gon na noiya Youth camp chu June Dt. 30 apat 3rd July chan ana kibol lin lolhing tah in ana kichai tai. Camp speaker Rev. Lamkeng Lhouvum le Camp Director Mr. Paolunlal Kipgen hinan camp chu ana kibol lin, camper mi som-

agi (70) in pan alaovin khangdong tamtah in kithah sem na le kipehdoh na anei jun, hiti chun thu le lan nom tah in kiman chah na aki neijin camp chu lolhing tah in aki chaitai. Houbung mite natoh phat nao

chungah Pathen nin phatthei naboh uhen lang, khangdong jouse jong Pathen nin phatthei boh jing ta hen.

Keima, Paolunlal Kipgen
Director Children Ministry KBC

S.Gelbung Baptist Church, KBC No.11. Revival Camp lolhingtah'a kichaita



Kipa Thuseina

Thupi : "Pakai henga kile kit taute" Kala 3:40
Speaker : Evan. Helun Chongloi
Camp Director : Evan. Letzangam Haokip
Duration : July 8-10, 2016.

Tuchung Revival Camp Speaker a eihung panpeh'u Evan. Helun Chongloi leh Evan. Letzangam Haokip in lolhingtah a Pathen thu tilkhouna eihung neipehna chunguva Houbung miten kipa thu seijou lou kahin phong un, chuleh amani jong Pathenin malam ah lolhingtah in machal jing lhon taken. Chuleh hiche Camp Sponsored eibol peh uvah S.Gelbung Baptist Church, Mission Board ho chungah seijoulou kipa thu akiphongin Pathenin M/E Board phungvuh jing taken.

Tuchung Revival Camp lolhin theina dia pan hinla Houbung mipite chungah avel in kipathu akiseijin, Pathen in Houbung mite tuleh atonsot geijin umpi jing taohen.

Board of Deacon, S.Gelbung Baptist Church.

Centre Church, Chassad KBC No.17 Solfa Training lolhingtah a Kichata.

Achesa nisim 5-15, lhamul 2016 sungin Centre Church, Chassad Youth Department tohgong dungjujin Khanglaite La lam'a khantouna thei dingin TONIC SOLFA TRAINING, Chassad Houbung mun'a ana kibol in, damsel chan Pathen mapuina jallin boina ima umlou hel in ana kichaitan ahi.

Instructed by: 1) Pa Thangboi Kipgen, Tuibuong ECA.
2) Pa S. Seiminthang Haokip, Song Leader, C/C Chassad.

Khanglai apang jat: 24.

D.Haoneo Haokip
Chairman, Youth Dept.
C/C Chassad No.17.

Minlal Haokip
Secretary, Youth Dept.
C/C Chassad, No.17.

SONGPHEL BAPTIST CHURCH CHATE CAMP LOLHING TAH A KIMANG



Songphel houbung toh gon na noija kibol chate camp chu June 16 - 19 chan ana kibol lin lolhing tah in aki chai tai. Camp speaker Pastor Satminlen Youth secretary le Mr Paolunlal kipgen akon nin Pathen thun chate tilkhon nale kihil na aum min chate mi jakhat vallin pan alaovin camp chu lolhing tah in akichai tai. Houbung miten chate lhagao hinkho ding gelna hitobang natoh lentah nagon nachung uva kipa thu kahin phonge. Pathen nin houg phatthei boh hen lang chate jouse jong lolhin na pe jing taken.

Kakipah e Keima Paolunlal Kipgen
Director Children Ministry KBC.

K. SALEMPHAI HOU-IN THAH KOT HONNA



Achesa nisim 12 July nikho chun KBC No.8 a um K. Salemphai hou-in thah chu Rev. Thanglen Haokip in Apa, Acha chuleh Lhagaotheng Pathen min in lhandohna leh katdohna ana neitan ahi. Hetthei khat hiche K. Salemphai hi houbung thah ahiuvin, itaonau vah geldoh jingu hite.

KBC Centre Church Salem Sapormeina muna Youth Camp



Achesa 25th -27th June Lhasunga KBC Centre Church Salem Sapormeina muna Youth Camp lolhing tah in akichelhan ahi. Speaker Rev. Lamkeng Lhouvum le Pastor Haopu Church Pastor, camp Director Gl. Thangkholun Singsit Youth Vice President KBC apangin ahi. Camper mi 110 aphan Jesu Christa kisan in Nule pate kom'a ngaidam thumna aneijun ahi.

AHLU KUT @Baptist Church, Maohing



Maohinga Ahlu Kut hi Evan. Haolet Chongloi in achesa kum 2006 kum a ana phudoh ahi.

Tukum chu Kum 10 alhinna ahin, KBC General Secretary jaona a Central Choir hotoh amankhom nau masapen jong ahi.

Ahlu maicham a hung kitohdoh chu bora 40 tobang ahin, bora khatna KG 50 chunglam cheh ahi.

Maohing houbungin tunia hungkal song Pastor hihen Gambih lamkai hihen Convention youth lamkai jouse jong Ahlu Kut ahitoh lhon in KG 20 cheh jong apeuvin ahi.

Artiste jong tukum Central Choir nungah gollhang ho apang un mi-jouse Pakai vahchoina la in asuhal un mijouse akipah soh keiyun ahi.

Mipi nehdingin Nepali changlhah leh Ahlu me tuitah in atui umlouvin ahon un nehkhomna aumin ahi.

Ahlu Kut lapi jong mipin sahhomna akineiyin ahi.

Nilhah program jong gon ahin Lasadin jong Gambih 5 a lasathem ana lhenhou Top 5 cheng jong agapuiyun ahi.

Central Choir member jouse jong Ahlu akipoh diuvin agonpeh un ahi.

Maohing climate dap dinden chu mijousen agatohkhan nopsalou koima aumpoi.

Pathen in Maohing Kho, Houbung phathei bohjing taheh....

KIPAPINA



Tutua KBC Women Work Committee member Pi Cecilia Chinneivah Haokip w/o Onjamang Haokip Moreh Baptist Church KBC No. 15 in tu majep a Autonomous District Council, Chandel District, member ding a nominate Member a lhendoh ahina chung a kipapina sangtah akineije. Pathen in mapuijing taken.

Editor, KBC Thuso

DR.COLVIN ACADEMY EDUCATIONAL TOUR 2016



Dr. Colvin Academy Study tour nisim 20-25 june 2016 sung in Staff mi 15 le Student mi 22, Darjeeling, Mirik(Nepal Border) le Siliguri mun ah Study tour ana kichen in ahi. Rev. D. Athang Haokip le a Staff member hon an neh tuitah le gena nomtah jong eina gonpeh un achung ah seijoulou kipathu akiseije



KBC HOUBUNG PHABEP A ANTHAH LOP

KIMAN NA HO

Kangui Christian College Natchan.



If undelivered, please return to
The Editor, KBC Thuso
KUKU BAPTIST CONVENTION
Opp. DM College, Imphal - 795 001
Contact : 9862633173

